

լու, պետք է որ վանքի մոտերքում լիներ կառուցված և հավանաբար այն վայրից ոչ հեռու, որտեղ գտնվում է նրա շինութեան արձանագրութիւնը, այսինքն այժմյան գյուղի այգիների մեջ (արձ. 175):

Հովհաննեսի առաջնորդութեան ժամանակ է կառուցվել նաև ներքին ժամատունը, ինչպես տեսանք, ամիր Քրդի և Գրիգոր Տուտեորդու օժանդակութեամբ, իսկ գմբեթակիր շորս սյունները շինվել են Լոռիի Կյուրիկե թագավորի երեք աղջիկների՝ Մարիամի, Բավրինայի, Ռուսուգանի, և քույր՝ Ռուսուգանի միջոցներով (տե՛ս արձ. 28—31):

Նկեղեցին նորոգող և ժամատունը շինող վարպետ Փամհայրի մասին ևս տեղում պահպանվել է մի արձանագրութիւն (արձ. 32), որով վանքի երախտագետ վանականները Աստվածածնա ավետման տոնի պատարագը մշտապես հատկացրել են նրան:

Հովհաննես Խաչենցի Լոռիի 1208 թվականի ժողովից հետո երկար չի ապրել: Այդ ժամանակ, հավանաբար, նա ծեր է եղել և շուտով վախճանվել է: Հովհաննեսը թաղվել է գյուղի արևելյան կողմում գտնվող «թեփակիր» խաչքարի մոտ, որի օրոցածև տապանաքարի վրա գրված է՝ «Յովհաննէս հայր»: Թվական չունի, բայց քանի որ 1211 թվականին Սանահնի վանքում արդեն առաջնորդ էր Վարդան վարդապետը, ուրեմն Հովհաննեսի մահը տեղի պետք է ունեցած լինի 1208—1211 թվականների ժամանակամիջոցում:

Վերոհիշյալ Հովհաննեսի օրով է, որ 1191 թվականին Զաքարյանների Համազասպ Մարծպանի թոռները՝ Քուրդը, Հասանը, Համազասպը և Մարգիսը, իրենց կալվածքներից Սանահնի վանքին են նվիրել Մանթաշ լեռան կեսը և Տաջրում իրենց ունեցած հողը:

1211 թվականին պատկանող մի հետաքրքիր արձանագրութեան մեջ, որ գրված է հայր Վարդանի և Գրիգոր վարդապետի առաջնորդութեան ժամանակ, Զաքարյան իշխանների գործակատար Վաչե իշխան Վաշտայանցը գրում է, որ ինքը մի խորան է շինել, բացի այդ, վանքին տվել է մի ոսկետուփ ավետարան, խաչ և թանկարժեք գործք

(առաքելոց): Այդպիսի ընթացիկ նվերներն այնքան շատ են, որ բոլոր արձանագրութիւնների կեսից ավելին են կազմում, բայց Զաքարյանները հատուկ հրովարտակով գյուղեր են հատկացրել վանքին, չնայած այն բանին, որ նրա հիմնադրման ժամանակ Բագրատունի թագավորները ևս գյուղեր և կալվածքներ էին նվիրել, որոնք հաստատվել են վանքի պատերին փորագրված արձանագրութիւններով:

Զաքարյանների տված նվերները, կարծում ենք, անհրաժեշտ են եղել վանքի համար այն պատճառով, որ Սանահնի միաբանների թիվն այդ ժամանակ անշափ շատացել էր: Մատենագրական մի վկայութեամբ Հաղբատա և Սանահնի վանքերի միաբանների թիվը դեռ ավելի վաղ շրջանում 500 էր: Իսկ 12—13-րդ դարերում ավելի շատ պետք է լիներ:

Ստեփանոս Տարոնեցի Սանահնի և Հաղբատի վանքերի միաբանութեան մասին գրում է հետևյալը՝

«Յաւուրս սորա (Աշոտոյ Ողորմածի) շինեցան կրօնաւորանոցք, ճգնաւորականաց տեղիք Սեաւորդեաց աշխարհին, հաւասարակեացք, միաբանականք, ըստ յառաջասցեալ կանոնին սահմանագրութեան սրբոյն Բարսղի, որոց երկոցունց տեղեացրն անուանք Հաղբատ և Սանահն հանդէպ միմեանց, միակրօնք ի տան Աստուծոյ՝ արանց Ե-ոց»¹:

Այդտեղ հետաքրքիր է միաբանների հավասարակյաց լինելը, որ, իբրև Հաղբատին ու Սանահնին հատուկ երևույթ, շեշտել է պատմագիրը:

Հավասարակյաց լինելը ենթադրել է տալիս միաբանութեան անդամների մասնավոր գույք չունենալը, բայց վանահայրերի և մյուս վանականների իրենց միջոցներով զանազան կառուցումներ անելը և վանքին նվերներ տալը, որոնց մասին բազմաթիվ ապացույցներ կան, ցույց են տալիս, որ հավասարակյաց բառը գործ է ածվել վանքի ներքին կանոնին հավասարապես բոլորի ենթարկվելուն և ոչ թե նրանց ունեցած անձնական գույքին կամ ինչքային հավասարութեան:

¹ Ս տ ե փ ա ն ո ս ի Տ ա ր ո ն ե ց ւ ո յ Ա ս ո ղ կ ա ն Պ ա տ մ ո թ իւ ն Տ ի ե ղ ե ր ա կ ա ն, ք տ Ի պ, Ս Պ Բ, 1885, էջ 181: